


Eduardo de Veer ta dedica "Aruba Panorama" na su tata



ORANJESTAD (AAN): Esaki ta discurso Sr. Eduardo de Veer durante anochi di premiere di Aruba Panorama.

Na ocasion di e premiere di Aruba Panorama, ta un placer y privilegio unico pa mi, na nomber di MetaCorp, pa dirigi algun palabra na e distinguido audiencia aki presente y pa yama boso tur, un bon bini na Crystal Theater.

"Experience Aruba Panorama" ta un pelicula cu un tecnologia nobo produci pa un empresa di Noruega, Caprino Panoramic. Nos di MetaCorp tin hopi elogio pa tur e hendenan y empresanan cu a coopera den un forma special na e produccion di e pelicula aki. Nos ta convenci cu den un forma espectacular, a haci justicia na e beyesa natural di nos pais. Nos dushi Aruba y su hendenan, nos flora y nos fauna, nos infraestructura, nos industria y nos instalacionnan turistico, tur a haya un posicion prominente den e produccion cu boso lo bay presencia. Nos ta confia, cu na final, boso mescos cu nos, lo sinti un gran emocion y...mescos cu nos, boso lo ta orguyoso di nos pida baranca "cu'n tin nada pa kibre". Meta principal di Aruba

Panorama ta pa informa nos turistanan den un forma breve pero impactante tocante nos historia, nos cultura y nos panorama.

MetaCorp tin un trayectoria comercial di mas cu ochenta aña, desde cu nos a introduci cine mudo na Aruba na 1920. Nombenan manera Cine Gloria, Aurora, Rialto, Cinelandia, Principal y Savaneta ta trece recuerdonan di nostalgia pa hopi.

Algun por corda pioneronan manera Dandan Kock, Frankie Franca, Esteban Hanst, Jan Dijkhoff, Francois Paris, Percy Sweetnam, Doli Luidens, mi abuelo Eddie de Veer y hopi mas cu a destaca den e prome oranan di nos empresa. Na nan y na pueblo di Aruba ta bay nos eterno gratitud.

Mi kier dedica e pelicula aki cu hopi sentimiento, na mi tata, Gerard de Veer, cu semper a motiva y stimula nos. Ate na 1929 dilanti di su tienda Westinghouse, cu Carlos Gardel na 1938, cu Consul Americano na premiere di the Roosevelt Story na 1950, cu Tito Guizar na 1951, cu Javier Cougat y Abby Lane na 1951, cu mi ruman Gerardo y ami na 1998, su so na

mas of menos den añanan 50. Cu e produccion aki, Aruba ta dispone di un producto di calidad di un nivel, te aworaki, unico den region di Caribe y nos por bisa cu nos ta un di e poco destinacion turistico cu por brinda un producto asina.

Nos empresa semper a demostra su confianza, invirtiendo grandemente den nos pais den tempo bon y den tempo malo. Nos compromiso cu Aruba y cu nos empleadonan semper ta presente den tur nos actividadnan. Nos empuhe ta yuda nos pais progresa y ora Aruba progresá, nos empresa y nos empleadonan tambe ta progresa. Nos semper a kere den e lema: "Actions speak louder than words".

Actualmente MetaCorp ta pasando den un renovacion grandi na Aruba Renaissance Resort, un renovacion cu lo tin su impacto riba henter e hotel, tur su 560 cambenan y demas facilidades haciendo di Aruba Renaissance un producto di calidad cu nos pais merece y por ta orguyoso di dje. Den esaki tambe nos a sobrepasa e expectativanan di

Renaissance su design team y demas ejecutivonan.

Ta precisamente den temponan dificil manera ciera di refinaria, manera devaluacion di Bolivar, manera efectonan di terrorismo y otro calamidadnan, nos empresa y su empleadonan a mantene nan optimismo y confianza den Aruba convirtiendo temponan dificil den oportunidadnan pa progreso. E pais aki ta di nos tur y nos tur mester ta hopi orguyoso di dje.

Permitimi expresa algun palabra di aprecio na nos Gobernador y su distinguida esposa, no solamente pasobranan ta honra nos cu nan presencia awe nochi, pero mi mester remarca cu nos tabata tin contacto cu nos Gobernador prome cu a cuminsa cu e trabaoan di filmacion. Nos Gobernador a muestra interes den e proyecto y a encurasha nos y desea nos hopi exito. Awe nochi, Señor Gobernador, boso por aprecia e trabao haci y nos kier pidi bo pa considera e "Aruba Panorama" aki manera un proyecto cu por a worde termina y presenta manera un digno despedida, justamente prome cu bo termina bo periodo di Gobernador.



Awor, lagami expresa algun palabra di aprecio pa un bon amigo di mi y amigo di hopi di boso aki presente, un bon patriota y yiu di tera, un pionero den nos turismo y bon conocedor di nos historia, di nos cultura y di nos balornan. Ora cu nos a inicia e proyecto di "Aruba Panorama" no tabata dificil pa pensa ariba Michael Kuiperi como e persona ideal pa guia e proyecto aki. Su compromiso cu perfeccion y su conocimiento di turismo ta bon conoci. Michael no a basila ni un momento pa acepta e reto y el a embarca den e proyecto for di su inicio. Locual boso lo presencia y sinti tin e toke special di Michael Kuiperi. el a guia henter e proceso y ora el a bay Noruega hunto cu mi colega Stef Nas, bou di ken e teatro aki y e centro comercial ta resorta. Michael a yamami pa

lagami sa cu e tabata contento y satisfecho cu e "rough cut" di e pelicula. "Eduardo, esaki ta un hoy y lo bo ta contento cune", Michael a bisami na telefon for di Noruega.

Esaki no tabata suficiente pa Michael pasobra durante e siguiente dos lunanan el a keda den un dialogo continuo cu e compositor di e sound track, cu e productor di e pelicula, cu e director di e pelicula y el a participa den e seleccion di e voz cu lo mester a haci e naracion. Te na ultimo detaye Michael a pone su toke personal ariba "Aruba Panorama" y na nomber di nos tur na MetaCorp mi kier bisa lo siguiente: "Michael, bo ta un Arubiano te den bo higrá, mashamashamasha danki y mi ta pidi bo subi riba stage pa bo ricibi un fuerte aplauso.

Fuji Image Digital
Caya Betico Croes 97
Tel-5828487

Pa Luna Di November
Tur Nos Camera, Digital
Camera, Aps Camera Na

